

CONVENIO DE COLABORACIÓN ENTRE A CONSELLERÍA DO MAR DA XUNTA DE GALICIA E A UNIVERSIDADE DE CORUÑA (UDC) PARA A REALIZACIÓN DO “PROXECTO DE ESTUDO TÉCNICO E MANEXO DE DIVERSAS ESPECIES DE MACROALGAS DE ESPECIAL IMPORTANCIA EN GALICIA” (ALGAPROX)

En Santiago de Compostela, 26 de maio de 2025

INTERVEÑEN

Dunha parte, D. Alfonso Villares Bermúdez, conselleiro do Mar, nomeado polo Decreto 44/2024, do 14 de abril (DOG n.º 73 do 14 de abril de 2024), actuando en nome e representación da Consellería do Mar da Xunta de Galicia, en virtude das facultades recoñecidas polo artigo 34 da Lei 1/1983, do 22 de febreiro, de normas reguladoras da Xunta e a súa presidencia.

Doutra parte, D. Ricardo José Cao Abad, reitor magnífico da Universidade da Coruña, que actúa en nome e representación dela en virtude do Decreto 1/2024, de 11 de xaneiro, polo que se lle nomea para tal cargo, e polas facultades conferidas pola Lei Orgánica 2/2023, de 22 de marzo, do Sistema Universitario e o Decreto 101/2004, de 13 de maio (modificado polo Decreto 194/2007, de 11 de outubro), polo que se aproban os Estatutos da Universidade da Coruña.

EXPOÑEN

PRIMEIRO

O Regulamento (UE) 2021/1139 do Parlamento Europeo e do Consello, do 7 de xullo de 2021, polo que se establece o Fondo Europeo Marítimo, de Pesca e de Acuicultura (FEMPA), e polo que se modifica o Regulamento (UE) 2017/1004, establece no seu artigo 3 as prioridades da Unión Europea para contribuír á aplicación da política pesqueira común e da política marítima da Unión; por outra banda, tamén sinala que o FEMPA contribuirá á consecución dos obxectivos medioambientais e de mitigación do cambio climático e de adaptación a este da Unión. Neste sentido, no ámbito da pesca e do medio mariño, o FEMPA establece o seguinte obxectivo para o período 21-27: “manter a pesca como actividade produtora sostible mediante a xestión sostible e a conservación dos ecosistemas mariños”.

Por outra banda, a prioridade 1 do artigo 3 do citado Regulamento 2021/1139 fai mención a “fomentar a pesca sostible e a recuperación e conservación dos recursos biolóxicos acuáticos”, desenvolvendo obxectivos específicos entre os que se atopan: reforzar as actividades pesqueiras que sexan económica, social e medioambientalmente sostibles, obter datos fiables que permitan tomar decisións baseadas no coñecemento e contribuír á protección e á recuperación da biodiversidade e os ecosistemas acuáticos.

Por Orde do 27 de xuño de 2022 créase a Rede entre o sector pesqueiro e os organismos científicos da Comunidade Autónoma de Galicia, en diante a Rede, coa finalidade de fomentar o intercambio e a transferencia de coñecementos entre os organismos científicos, o sector pesqueiro e a administración pesqueira de Galicia.

Os obxectivos e tarefas do presente convenio foron propostos e aceptados na reunión extraordinaria da Rede celebrada o día 27 de Novembro de 2024, considerando a realización do proxecto presentado, aliñado coa finalidade da Rede, de interese para os seus participantes e para o sector pesqueiro en particular, así coma para o ben común e interese xeral.

Segundo o establecido no artigo 8 do Regulamento Interno da Rede, presentada a proposta por parte do Centro de Investigacións Mariñas (CIMA), da Universidade da Coruña (UDC), a Federación Galega de Confrarías de Pescadores, a Confraría de pescadores de Ribadeo, a Confraría de pescadores de Vilanova de Arousa (A Pastoriza), a Organización de produtores de marisco e cultivos mariños da provincia de Pontevedra (OPP20), e a confraría de pescadores San José de Cangas, denominada "Proxecto de estudo técnico e manexo de diversas especies de macroalgas de especial importancia en Galicia". (ALGAPROX), e unha vez informada favorablemente pola Dirección Xeral que comprobou a integridade da documentación presentada e a adecuación á medida do FEMPA.

SEGUNDO

Que a Lei 14/2011, do 1 de xuño, da ciencia, a tecnoloxía e a innovación ("Lei da ciencia"), no seu artigo 34.1, establece que os axentes públicos do Sistema Español de Ciencia, Tecnoloxía e Innovación, incluídos as universidades públicas, os organismos públicos de investigación da Administración Xeral do Estado, os organismos de investigación doutras administracións públicas, e os centros e institucións do Sistema Nacional de Saúde, poderán subscribir convenios suxeitos ao dereito administrativo.

Así mesmo, devandito artigo 34.1 prevé que poderán celebrar estes convenios os propios axentes públicos entre si, ou con axentes privados que realicen actividades de investigación científica e técnica, nacionais, supranacionais ou estranxeiros, para a realización conxunta das seguintes actividades: proxectos e actuacións de investigación científica, desenvolvemento e innovación; creación ou financiamento de centros, institutos e unidades de investigación; financiamento de proxectos científico-técnicos singulares; formación de persoal científico e técnico; divulgación científica e tecnolóxica e uso compartido de inmoables, de instalacións e de medios materiais para o desenvolvemento de actividades de investigación científica, desenvolvemento e innovación. Particularmente, as letras a) e d) do artigo citado son aplicables ao presente convenio debido a que o obxecto do mesmo refírese a un proxecto de investigación científica, desenvolvemento e innovación, así como á formación de persoal científico- técnico.

TERCEIRO

Que a Universidade da Coruña (UDC) é unha entidade de dereito público dotada de personalidade xurídica e patrimonio propios, sendo un organismo público de investigación (OPI), que goza de autonomía para a consecución dos seus fins e o desenvolvemento das súas funcións, de acordo co artigo 27.10 da Constitución Española e a Lei Orgánica 2/2023, do 22 de marzo, do sistema universitario, e que ten como fins prioritarios o fomento da investigación e a innovación, así como a súa transferencia á sociedade. Para o cumprimento destes fins, esta universidade mantén relacións con centros de investigación e con institucións culturais e sociais e promove a celebración de convenios de investigación e transferencia tecnolóxica e de coñecemento con

entidades e organismos públicos e privados, así como traballos de carácter científico, técnico, artístico ou docente.

CUARTO

Que a Consellería do Mar é o órgano da Administración galega ao que lle corresponden as competencias en materia de ordenación e fomento do sector pesqueiro, marisqueiro, acuícola e de transformación de produtos do mar no ámbito de Galicia, de conformidade co establecido no Estatuto de Autonomía para Galicia e segundo os termos sinalados pola Constitución Española, sen prexuízo das competencias que lles poidan corresponder a outros organismos da Comunidade Autónoma de Galicia.

Que de acordo ao establecido no Decreto 50/2021, do 11 de marzo polo que se aproba a estrutura orgánica da Consellería do Mar, correspóndelle a esta Consellería a investigación mariña e a coordinación, programación e execución de actividades de divulgación e transferencia tecnolóxica nas comunidades pesqueiras e litorais, así como a programación, supervisión, realización e difusión de publicacións e outro material científico e didáctico.

Que a Dirección Xeral de Desenvolvemento Pesqueiro, forma parte da Consellería do Mar, de acordo co aludido Decreto de estrutura orgánica e exerce as funcións de ordenación do marisqueo, o establecemento das condicións para o exercicio da actividade marisqueira e a conservación, protección e xestión sostible dos recursos marisqueiros, así como a investigación mariña, que se desenvolve en coordinación coa consellería competente en materia de investigación e desenvolvemento tecnolóxico.

Que o Servizo de Planificación, como órgano de apoio da Subdirección Xeral de Investigación e Apoio Científico-Técnico, da Dirección Xeral de Desenvolvemento Pesqueiro ten atribuídas as competencias específicas indicadas no artigo 12.2.4.2 do Decreto 50/2021, do 11 de marzo, polo que se aproba a estrutura orgánica da Consellería do Mar, entre as que se atopa a xestión de actuacións en materia de estudo, avaliación ou seguimento dos recursos mariños naturais e da actividade pesqueira, marisqueira e da acuicultura.

QUINTO

A Xunta de Galicia, como socio da proposta de investigación ALGAPROX, e a Universidade da Coruña, desexan establecer unha colaboración para a realización dun proxecto que pretende levar a cabo diversas experiencias con especies de algas de interese para o sector pesqueiro e marisqueiro, ben sexa porque supoñen un recurso, porque posúen un alto valor comercial ou porque a súa proliferación prexudica tanto ao medio ambiente como ao recurso e así poder determinar as mellores formas de aproveitamento e xestión, no caso das especies autóctonas e de control ou erradicación, no caso das especies foráneas.

A UDC levará a cabo as actividades recollidas na proposta presentada e aprobada “Proxecto de estudo técnico e manexo de diversas especies de macroalgas de especial importancia en Galicia. (ALGAPROX)”, para acadar a finalidade do proxecto.

A Estratexia de Especialización Intelixente (RIS3) de Galicia 2021-2027, aprobada por acordo do Consello da Xunta de Galicia do 8 de abril de 2022, define o marco das políticas de investigación e innovación na Comunidade Autónoma para este período. Como instrumento de planificación

operativa para a súa implementación entre 2025 e 2027, o Consello da Xunta aprobou o 3 de febreiro de 2025 o Plan galego de investigación e innovación 2025-2027

O presente convenio enmárcase na RIS3 de Galicia 2021-2027, aliándose co reto 1 (modelo de xestión de recursos naturais e culturais baseados na innovación) e coa prioridade 1 (sostibilidade), en concreto co ámbito de priorización de mellora, preservación, xestión sostible e posta en valor da biodiversidade. Así mesmo, contribúe ao obxectivo estratéxico 1, integrándose polo tanto no programa Integra da RIS3 e no programa Coñecemento do Plan galego de investigación e innovación 2025-2027.

Ademais, ambas as partes entenden que a súa colaboración promove, dentro do ámbito da actividade pesqueira, un triplo obxectivo de sustentabilidade: ambiental, social e económico, en liña cos Obxectivos de Desenvolvemento Sustentable (concretamente o Obxectivo 14), no marco da Axenda 2030 e do Pacto Verde Europeo.

SEXTO

Que para o desenvolvemento das funcións asumidas por cada unha das entidades participantes e xestionar da forma máis eficiente os fondos FEMPA asignados ás mesmas, así como regular as condicións e compromisos que correspondan a cada unha das partes, estas conveñen en formalizar, a tales efectos, o presente convenio que se rexerá polas seguintes

CLÁUSULAS

PRIMEIRA.- OBXECTO

O presente convenio ten por obxecto establecer as condicións polas que se rexerá a colaboración entre a Xunta de Galicia, a través da Consellería do Mar, e a Universidade da Coruña, co fin de levar a cabo o "Proxecto de estudo técnico e manexo de diversas especies de macroalgas de especial importancia en Galicia. (ALGAPROX)".

Este convenio regula os compromisos das partes para a execución conxunta das mencionadas actuacións, incluíndo a organización do traballo, a xestión e xustificación da realización dos respectivos compromisos, os dereitos e obrigacións das partes, a distribución dos fondos e a titularidade dos resultados, así como a resolución dos posibles conflitos.

SEGUNDA.- TAREFAS A REALIZAR

Para o cumprimento do obxecto do convenio, a Universidade da Coruña, en coordinación coa Consellería do Mar, comprométese a realizar as seguintes actividades:

1. **Experiencia de mellora de manexo de *Himantalia elongata*:** Na que se explorarán formas eficaces de colleita que maximicen as probabilidades de recrutamento natural.
2. **Experiencia de reforzo de poboacións de *Himantalia elongata*:** Na que se reforzarán a súas poboacións mediante sementa de embrións, co fin último de garantir a sostibilidade do recurso

3. **Experiencia de control de *Sargassum muticum*:** na que se explorará a eficiencia de distintos métodos para controlar ou minimizar o impacto negativo desta especie sobre o ambiente e os recursos mariños e se investigará se sería posible eliminala en determinados lugares de especial importancia ecolóxica e/ou económica
4. **Experiencia de estudo da fenoloxía de *Undaria pinnatifida*:** na que se determinará o impacto ecolóxico e socioeconómico (xa que se trata dun alga comercializable) nos diferentes hábitats que coloniza: bateas, portos, fondos mariños e hábitats intermareais e se tentará comprender mellor a súa dinámica poboacional, o cal será importante para elaborar futuras medidas de xestión e predicir factores como a invasividade da mesma e predicir o seu impacto ecolóxico
5. **Experiencia de control de *Ulva clathrata*:** Na que se vai ensaiar unha forma de manexo da especie para minimizar os efectos perniciosos que supón a súa proliferación sobre os bancos marisqueiros
6. **Experiencia de herbivoría sobre *Himantalia elongata* e *Undaria pinnatifida*:** Na que mediante gaiolas de exclusión e cámaras de vídeo submarinas analizaranse os efectos da depredación sobre as poboacións destas especies
7. **Realización dunha colección de algas de toda a costa galega, denominada “Algario CIMA”:** Na que se recollerán e herborizarán diferentes exemplares de algas da nosa costa, e na que se confeccionará unha base de datos da mesma con toda a información relevante de cada un dos espécimes herborizados.

Os resultados agardados son:

1. Establecer as bases biolóxicas e ecolóxicas das especies de interese a fin de elaborar un deseño e unha metodoloxía axeitados para o seu seguimento no litoral galego.
2. Optimizar a explotación dos recursos mediante o traballo conxunto co sector pesqueiro
3. Analizar a estrutura das poboacións e facer recomendacións para cada especie
4. Mellorar a xestión da explotación no caso de *Himantalia elongata*
5. Reforzar as poboacións de *Himantalia elongata* mediante sementeiras de embrións producidos en laboratorio
6. Medir o estado actual e a evolución das poboacións das algas alóctonas *Sargassum muticum*, e *Undaria pinnatifida*
7. Potenciar estudos para analizar a evolución de *S. muticum*, *U. pinnatifida*, *U. clathrata*, e *H. elongata* nas costas do noso litoral
8. Transmitir ao sector pesqueiro e marisqueiro as bases biolóxicas de cada unha das especies estudadas, así como a súa interacción con outras especies e co medio.
9. Fortalecer a relación entre o sector da investigación e o sector pesqueiro e marisqueiro a fin de reforzar a sustentabilidade da explotación dos recursos mariños.

Plan de difusión dos resultados:

1. Informes intermedios e informe final do proxecto. Informarase anualmente dos avances da acción e dos resultados mais destacados do proxecto.
2. Elaboración de artigos de divulgación científica sobre a importancia das macroalgas como hábitat e recurso e da súa influencia sobre outros recursos.
3. Publicación en revistas sobre os resultados de xestión e selección de indicadores.
4. Actividades formativas sobre macroalgas, a súa bioloxía, o seu cultivo e o seu aproveitamento como recurso no Instituto Galego de Acuicultura (IGafa) e en varios IES de Galicia.
5. Asistencia a foros.
6. Elaboración dun vídeo divulgativo do proxecto e as súas actividades.
7. Elaboración de folletos sobre o proxecto.
8. Difusión do proxecto a as súas experiencias en redes sociais.
9. Presentación final de resultados ante o sector na sede da Federación Galega de Confrarías de Pescadores.

Actividades a realizar:

Actividade e período	Nº de participantes por entidade e resultados
Período/datas: Maio 2025 – Outubro 2026 Actividade 1: Experiencia de mellora de manexo de <i>Himantalia elongata</i> .	Nº de participantes por entidade: CIMA: 4, FGCP: 1, C.P. Vilanova: 1, UDC: 3 Resultado/s: Mellora na xestión da explotación deste recurso. Potenciamiento dos estudos para analizar a evolución de <i>H. elongata</i> nas costas do noso litoral
Período/datas: Maio 2025– Outubro 2026 Actividade 2: Experiencia de reforzo de poboacións de <i>Himantalia elongata</i>	Nº de participantes por entidade: UDC: 3, FGCP: 1, C.P. Cangas: 1 Resultado/s: Reforzo das poboacións de <i>Himantalia elongata</i> mediante sementeiras de embrións producidos en laboratorio
Período/datas: Maio 2025 – Outubro 2026 Actividade 3: Experiencia de control de <i>Sargassum muticum</i>	Nº de participantes por entidade: CIMA: 4, FGCP: 1, C.P. Ribadeo: 1, OPP20: 1, UDC: 3 Resultado/s: Minimización do impacto negativo desta especie sobre o ambiente e os recursos mariños. Medición do estado actual e a evolución das poboacións.
Período/datas: Maio 2025– Xaneiro 2027 Actividade 4: Experiencia de estudio da fenoloxía de <i>Undaria pinnatifida</i>	Nº de participantes por entidade: CIMA: 4, FGCP: 1, OPP20: 1, Cangas, UDC: 3 Resultado/s: Establecemento das bases biolóxicas e ecolóxicas da especie a fin de elaborar un deseño e unha metodoloxía axeitados para o seu seguimento no litoral galego.

<p>Período/datas: Maio 2025 – Novembro 2026</p> <p>Actividade 5: Experiencia de control sobre <i>Ulva Clathrata</i></p>	<p>Nº de participantes por entidade:</p> <p>CIMA: 4, FGCP: 1, OPP20: 1, UDC: 3</p> <p>Resultado/s: Minimización dos efectos perniciosos que supón a súa proliferación sobre os bancos marisqueiros</p>
<p>Período/datas: Maio 2025 – Xaneiro 2027</p> <p>Actividade 6: Experiencia de herbivoría sobre <i>Himantalia elongata</i> e <i>Undaria pinnatifida</i></p>	<p>Nº de participantes por entidade:</p> <p>UDC: 3, FGCP: 2, C.P. Cangas:1, OPP20: 1</p> <p>Resultado/s: Análise dos efectos da depredación sobre as poboacións destas especies. Transmisión ao sector pesqueiro e marisqueiro as bases biolóxicas de cada unha das especies estudadas, así como a súa interacción con outras especies e co medio.</p>
<p>Período/datas: Maio 2025 – Xaneiro 2027</p> <p>Actividade 7: Realización dunha colección de algas de toda a costa galega, denominada " Algarío CIMA</p>	<p>Nº de participantes por entidade:</p> <p>CIMA:4, UDC: 3</p> <p>Resultado/s: Constitución dunha base dos estudos taxonómicos das algas en Galicia como parte fundamental na investigación da flora e da ecoloxía mariña tanto de poboacións como de comunidades costeiras así como da biodiversidade.</p>

Cronograma de execución das actividades

Anualidade	2025								2026											27	
	MAI	XUN	XUL	AGO	SET	OUT	NOV	DEC	XAN	FEB	MAR	ABR	MAI	XUN	XUL	AGO	SET	OUT	NOV	DEC	XAN
Mes	1	2	3	4	5	6	7	8	9	10	11	12	13	14	15	16	17	18	19	20	21
Actividade 1																					
Actividade 2																					
Actividade 3																					
Actividade 4																					
Actividade 5																					
Actividade 6																					
Actividade 7																					

A Consellería do Mar realizará as correspondentes actividades de avaliación científico-técnica e económica sobre o grao de cumprimento e adecuación das actuacións da Universidade da Coruña.

TERCEIRA.- ENTREGABLES INDISPENSABLES PARA ENTENDER CUMPRIDOS OS OBXECTIVOS DESTE CONVENIO

A Universidade da Coruña comprométese a remitir en prazo á Consellería do Mar os seguintes entregables para entender cumprido o obxecto do convenio:

1. Informes parciais ao final de cada anualidade (decembro de 2025 e decembro de 2026)
2. Informe final (Xaneiro de 2027)

CUARTA.- COMPROMISOS DAS PARTES

Para o cumprimento do obxecto do convenio, ambas partes comprométense a realizar as actividades e tarefas mencionadas na cláusula segunda e a remitir os entregables indispensables mencionados na cláusula terceira.

Ao mesmo tempo, as partes comprométense á realización das seguintes actuacións:

- Participar nas actividades colaborativas organizadas no marco do convenio.
- Entregarse mutuamente calquera información que sexa necesaria para o correcto desenvolvemento das diferentes actividades, feito, problema ou atraso que poida afectar adversamente ao desenvolvemento do convenio. Así mesmo, as partes proporcionarán, sen demora, toda a información que o mecanismo de seguimento requira razoablemente para levar a cabo as súas tarefas.
- Garantir a protección dos resultados da investigación e promover a difusión que, no seu caso, proceda.
- Dar a adecuada publicidade ao carácter público do financiamento do investimento realizado, con expresa mención á participación do Fondo Europeo Marítimo, de Pesca e de Acuicultura, nos termos regulamentariamente establecidos.

Deberase recoñecer que a operación recibiu o apoio dos fondos, adoptando en todas as medidas de información e comunicación:

- a) O emblema da Unión Europea.
- b) Unha referencia ao Fondo Europeo Marítimo, de Pesca e de Acuicultura (FEMPA), que apoia a operación.
- c) O logotipo da Consellería do Mar.

- Someterse ás actuacións de verificación, así coma ás actuacións de control financeiro que correspondan á Intervención Xeral da Comunidade Autónoma de Galicia en relación cos fondos aplicados, ás previstas na lexislación do Tribunal de Contas e do Consello de Contas, ás da autoridade de xestión e, de ser o caso, dos servizos financeiros da Comisión Europea e do Tribunal de Contas Europeo, e facilitar tanta información lle sexa requirida no exercicio das actuacións anteriores.
- Facilitar toda a información que lles sexa requirida pola Intervención Xeral da Comunidade Autónoma, polo Tribunal de Contas e polo Consello de Contas ou calquera outra instancia autonómica, estatal ou comunitaria de control, no exercicio das súas respectivas funcións de fiscalización e control do destino dos fondos aplicados, e facilitar a inspección.
- Manter un sistema de contabilidade separado ou un código de contabilidade apropiado que proporcione un rexistro de auditoría adecuado en relación con todos os gastos correspondentes aos investimentos realizados en virtude deste convenio, e conservar a documentación xustificativa relativa ao seu financiamento.
- Custodiar e conservar a documentación da actividade financiada polo FEMPA, de conformidade co artigo 82 do Regulamento (UE) 2021/1060, do 24 de xuño de 2021, polo que se establecen as disposicións comúns, e o artigo 132 do Regulamento (UE, EURATOM) 2018/1046 do Parlamento Europeo e do Consello, do 18 de xullo de 2018, sobre as normas financeiras aplicables ao orzamento xeral da Unión.

Neste sentido, deberánse conservar os documentos xustificativos e demais documentación relativa ao financiamento durante un período de cinco anos, a partir do 31 de decembro do ano no que se realizou o último pago.

- De acordo co Plan Xeral de Prevención de Riscos de Xestión e Medidas Antifraude da Xunta de Galicia, todas as entidades deberán aplicar e esixir medidas antifraude, así como cubrir as oportunas declaracións de ausencia de conflito de interese.

Calquera persoa que teña coñecemento de feitos que poidan constituír fraude ou irregularidade en relación cos proxectos financiados con cargo a fondos da Unión Europea, como é o caso deste convenio, poderán poñelos no coñecemento do Servizo Nacional de Coordinación Antifraude (SNCA) da Intervención Xeral da Administración do Estado, polos medios electrónicos a través da canle habilitada para o efecto polo dito servizo no enderezo web <http://www.igae.pap.minhafp.gob.es/sitios/igae/es-ES/Paginas/denan.aspx>, e nos termos establecidos na Comunicación 1/2017, do 6 de abril, que se pode consultar no enderezo web <http://www.igae.pap.minhafp.gob.es/sitios/igae/es-ES/snca/Documents/ComunicacionSNCA06-04-2017Canaldenuncias.pdf>.

Sen prexuízo disto, tamén poderá utilizar a ligazón de denuncias sobre irregularidades ou condutas fraudulentas que terá a súa sede no Sistema Integrado de Atención ao Cidadán (SIACI): <https://transparencia.xunta.gal/canle-de-denuncias>.

- Facilitar cantos datos resulten necesarios para a avaliación da RIS3 de Galicia 2021-2027 ou doutros mecanismos relacionados coa medición da I+D+i., entre outros as enquisas do INE. Tendo en conta que a localización do proxecto ten que ser Galicia, os datos asignados aos citados instrumentos de avaliación deberán estar rexistrados na Comunidade Autónoma de Galicia.

QUINTA.- RÉXIME ECONÓMICO

O importe total das achegas previstas no convenio por parte da Consellería do Mar á Fundación da Universidade de A Coruña ascenden a un total de 61.000€ (sesenta e un mil euros), distribuídos en dúas anualidades: 35.000 € (trinta e cinco mil euros) no 2025 e 26.000 € (vinte e seis mil euros) no 2026.

As ditas achegas financiaranse con cargo á aplicación orzamentaria 16.03.723A.640.1 (código de proxecto 2024 141) dos Orzamentos Xerais da Comunidade Autónoma de Galicia.

As actuacións recollidas no presente convenio son financiáveis, nun 70 %, co Fondo Europeo Marítimo, de Pesca e de Acuicultura (FEMPA). Faise constar tamén a elixibilidade da actuación que se pretende no marco da Prioridade da Unión, Obxectivo e Tipo de Actividade do FEMPA 1.6.3: Impulso da investigación dos recursos mariños e sistemas de gobernanza, prevista no artigo 26 do Regulamento (UE) 2021/1139, de 7 de xullo de 2021. Esta participación farase constar en todas cantas actuacións se realicen ao abeiro deste convenio.

O importe que a Consellería do Mar achegará ten como destino exclusivo a compensación dos custos nos que incorre a Universidade de A Coruña, na realización dos traballos e por causa exclusiva do seu desenvolvemento, polo que non existe ánimo de lucro por parte desta última. A achega convida non se fai en concepto de contraprestación, e no convenio non haberá intercambio de prestacións patrimoniais, nin dita achega poderá ser cualificada de prezo, aínda que se faga en diñeiro, senón de compensación de custos.

Os gastos deberán ser realizados, facturados e efectivamente pagados dentro do ámbito temporal do propio convenio e, polo tanto, no referido unicamente a actuacións realizadas a partir da sinatura do convenio e ata o 30 de setembro de 2026, coas seguintes datas de xustificación para os períodos de realización de gastos e pagos imputables a cada anualidade:

Data límite de xustificación	Período imputable
30 de novembro de 2025	Desde a sinatura do convenio ata o 30/11/2025
30 de setembro de 2026	Desde o 01/12/2025 ata o 30/09/2026

As cantidades indicadas faranse efectivas mediante transferencia bancaria na conta aberta a nome da Universidade da Coruña que esta indique e certifique (indicando no concepto da transferencia o acrónimo ou código identificativo que acorden), e previa conformidade do ordenante do pago, coa alusión ao cumprimento das actividades recollidas na cláusula segunda.

A dita conformidade realizarase unha vez completadas as actividades obxecto deste convenio e previa presentación á Consellería do Mar da seguinte documentación xustificativa:

1. Memoria de execución das actividades recollidas na cláusula segunda, con indicación detallada das actuacións realizadas, dos resultados obtidos e da porcentaxe de cumprimento de cada actividade.

Deberá incluír unha relación das persoas/entidades que participaron nas mesmas e unha descrición específica das actividades realizadas por cada unha delas.

A memoria incluírá a acreditación da publicidade realizada.

2. Memoria económica coa xustificación dos gastos incorridos. A memoria incluírá:

- Unha relación detallada de gastos e pagos realizados.
- Documentación acreditativa dos gastos, consistente en facturas ou documentos de valor probatorio equivalente no tráfico xurídico mercantil ou con eficacia administrativa. Cando o beneficiario non dispoña de facturas electrónicas, deberá achegar unha copia en formato PDF dos documentos orixinais.
- Documentación xustificativa do pago: copia de transferencias bancarias, certificados bancarios ou extractos bancarios, ou documentos obtidos a través de banca electrónica. Nestes documentos deberán estar claramente identificados o receptor e o emisor do pago, o número e o monto total da factura pagada.

En dita xustificación permitirase un transvasamento de fondos entre os conceptos recollidos na solicitude de ata un 20%.

3. Relación detallada doutros ingresos ou axudas que financiasen a actividade obxecto da transferencia, con indicación da súa contía e procedencia (declaración de axudas solicitadas ou outorgadas para o mesmo proxecto ou para as mesmas partidas de gastos, procedentes de calquera administración ou ente público ou privado, nacional ou internacional).

4. Indicación do lugar e do órgano de custodia da documentación acreditativa orixinal.

Sen prexuízo da documentación sinalada nos puntos anteriores, poderá ser requirida a achega dos datos, documentos complementarios e aclaracións que sexan necesarios para a tramitación e resolución do procedemento.

En todo caso, a xustificación axustarase ás esixencias da normativa da Unión Europea e nacional relativa ao FEMPA.

Procederase ao reintegro, total ou parcial, dos fondos recibidos e os intereses de demora devengados, dende o momento do pago e ata a data na que se acorde a procedencia do reintegro, no caso de incumprimento das condicións establecidas neste convenio e que imposibilitan a percepción económica compensatoria do traballo realizado.

SEXTA.- COMISIÓN MIXTA DE SEGUIMIENTO

Constituirase unha comisión mixta para o seguimento, interpretación e avaliación das accións derivadas do presente convenio, que asegure o bo fin e cumprimento do mesmo.

Por parte da Consellería do Mar, serán membros: a Directora Xeral de Desenvolvemento Pesqueiro e a persoa titular da xefatura do Servizo de Planificación.

Por parte da UDC, serán membros: a persoa titular da Vicerreitoría de Investigación e Transferencia, Jerónimo Puertas Agudo, e o responsable do proxecto, Javier Cremades Ugarte.

A asistencia ás reunións que celebre a comisión terán carácter delegable en persoas pertencentes á mesma entidade da que delegue. Así mesmo, poderán asistir ás mesmas, con voz e sen voto, aquelas persoas que sexan requiridas en función da súa experiencia ou profesionalidade e por razón da materia concreta da que se vaia a tratar.

A comisión mixta de seguimento rexerese polo establecido para os órganos colexiados na sección III, capítulo I do título primeiro da Lei 16/2010, do 17 de decembro, de organización e funcionamento da Administración xeral e do sector público autonómico de Galicia (LOFAXGA).

SÉTIMA.- PROPIEDAD DOS DATOS E DIFUSIÓN DOS RESULTADOS. USO DE SIGNOS DISTINTIVOS

A Consellería do Mar e a UDC manterán confidencialidade sobre calquera información relativa aos resultados das actuacións realizadas ao abeiro deste convenio, sempre que non sexan de dominio público, non desvelándoa de ningún xeito sen autorización expresa da outra parte e non utilizándoa para calquera outro propósito que non sexa o expresamente permitido polo presente convenio.

A propiedade e utilización científica dos datos obtidos a partir das experiencias desenvolvidas no proxecto e os resultados finais da investigación serán exercidas conxuntamente pola Consellería do Mar e a UDC. Unha vez executadas as investigacións descritas no convenio, comprométese a intercambiar o material científico e os coñecementos obtidos, así como a publicar conxuntamente os resultados da investigación obxecto do convenio.

Neste sentido, cando se realice calquera tipo de comunicación ou divulgación dos resultados, xa sexa parcial ou total, farase mención explícita ao feito de que os datos obtidos a partir das experiencias desenvoltas e os resultados das análises son froito do presente convenio. Ademais, deberán aparecer os signos distintivos das partes nos soportes utilizados para a divulgación dos resultados, tendo en conta que a denominación legal e social das partes, as súas marcas rexistradas, logotipos e calquera signo distintivo son propiedade exclusiva de cada unha delas.

Por iso, a UDC autoriza á Consellería do Mar para que use o seu nome e/ou logotipo conforme á normativa de imaxe institucional aplicable, sempre que o uso que vaian realizar do mesmo se limite exclusivamente a indicar a relación establecida entre as institucións no presente convenio, polo tempo que esta dure, e non induza a confusión organizativa, comercial ou de aval científico entre aquela parte e a UDC nin o asocie a obxectivos ou actividades incompatibles cos principios e obxectivos da administración, e sen que, en ningún caso, se lles confira dereito algún de exclusividade, nin permita a súa apropiación, mediante rexistro ou calquera outro procedemento. Calquera outro tipo de uso ou dúbida razoable sobre a adecuación de uso ao expresado anteriormente, requirirá a autorización previa e expresa, por escrito, da UDC.

Igualmente, a Consellería do Mar autoriza á UDC para o uso do seu nome e/ou logotipo en termos equivalentes aos descritos no parágrafo anterior.

En todos os documentos e medidas de información e comunicación recoñecerase o apoio dos fondos FEMPA mediante a inclusión do emblema da Unión, unha referencia ao Fondo Europeo Marítimo, de Pesca e de Acuicultura (FEMPA) que financia a actuación, incluíndo a porcentaxe (70%) e o logotipo da Xunta de Galicia.

Durante a duración do convenio informarase do apoio dos fondos FEMPA mediante unha breve descrición da operación no sitio web e colocando un cartel con información sobre as actuacións realizadas (tamaño mínimo A3).

OITAVA.- PUBLICACIÓNS

Nas publicacións das actuacións do convenio deberán respectarse os dereitos dos membros do equipo de investigación, en especial o dereito para ser designados como inventores ou autores.

Cando unha das partes desexe utilizar, en parte ou na súa totalidade, dita información para a súa publicación como artigo, conferencia ou outro formato, deberá solicitar a conformidade á outra parte por escrito que, á súa vez, deberá responder nun prazo máximo de trinta (30) días. Transcorrido o devandito prazo sen obter resposta, considerarase que a parte correspondente autoriza a utilización da devandita información.

As publicacións deberán recoñecer e facer constar a participación de todos os investigadores que interviñeron, así como a súa pertenza ás institucións das cales dependan. En calquera dos casos de difusión, farase sempre especial referencia ao organismo financiador e deberase remitir copia.

No suposto de resultados susceptibles de protección, así como de explotación, as partes, nun prazo máximo de tres (3) meses a partir da súa obtención, comprométese a subscribir un documento no que se determinará a titularidade dos dereitos de propiedade industrial e as condicións da súa explotación.

En calquera caso, ambas as entidades poderán facer uso dos coñecementos adquiridos durante a execución do convenio en actividades propias da súa función investigadora.

NOVENA.- MODIFICACIÓN

As partes poderán modificar, por acordo mutuo, os termos do presente convenio, debendo quedar reflectido por escrito a través da subscripción dunha addenda dentro do período de vixencia do mesmo.

DÉCIMA.- RESOLUCIÓN DO CONVENIO E CONSECUCIAS EN CASO DE INCUMPRIMENTO

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Serán causa de resolución:

- O transcurso do prazo de vixencia do convenio sen acordarse a prórroga do mesmo.
- O acordo unánime de todos os asinantes.
- O incumprimento das obrigacións e compromisos asumidos por parte dalgún dos asinantes.
- A decisión xudicial declaratoria da nulidade do convenio.
- Calquera outra causa distinta das anteriores prevista nas leis.

En caso de incumprimento das obrigacións e compromisos asumidos por parte dalgún dos asinantes, a parte afectada convocará á comisión mixta de seguimento establecida na cláusula sexta para os efectos da adopción das medidas necesarias para o seu cumprimento.

Se tras a actuación da comisión mixta de seguimento persistise o incumprimento, a parte afectada poderá entender extinguido o convenio e esixir á incumplidora a indemnización por danos e prexuízos que legalmente lle corresponda.

Cando concorra algunha causa de resolución do convenio, se existen actuacións en curso de execución, poderase acordar, a proposta da comisión de seguimento, a continuación e finalización destas nun prazo improrrogable, transcorrido o cal o convenio deberá liquidarse. O devandito prazo será fixado polas partes cando se resolva o convenio, de conformidade co previsto no artigo 52.3 da Lei de réxime xurídico do sector público (LRXSP).

UNDÉCIMA.- RÉXIME XURÍDICO E RESOLUCIÓN DE CONFLICTOS

Este convenio ten carácter administrativo, rexerese polas súas propias cláusulas e polo réxime xurídico en materia de convenios, previsto no capítulo VI do título preliminar da Lei 40/2015, do 1 de outubro, de réxime xurídico do sector público e demais normas de dereito administrativo.

As partes acordan que calquera diverxencia, discrepancia ou controversia que puidesen xurdir relativas á interpretación ou execución do presente convenio, que non poida resolverse pola comisión mixta de seguimento indicada na cláusula sexta, será sometida aos órganos da xurisdición contencioso-administrativa.

DUODÉCIMA.- ENTRADA EN VIGOR E DURACIÓN

A vixencia do convenio comezará a contarse dende a súa sinatura e finalizará o 31 de xaneiro de 2027, podendo prorrogarse expresamente e de mutuo acordo a través da subscripción dunha addenda con anterioridade á súa finalización, se as partes o consideran oportuno, de conformidade co disposto no artigo 49.h) da Lei 40/2015, de 1 de outubro, de réxime xurídico do Sector Público.

Este convenio será obxecto de publicación segundo o establecido no artigo 15 da Lei 1/2016, do 18 de xaneiro, de transparencia e bo goberno da Administración galega.

DÉCIMO TERCEIRA.- PROTECCIÓN DE DATOS DE CARÁCTER PERSOAL E GARANTÍA DOS DEREITOS DIXITAIS

As partes asinantes comprométese a tratar os datos de carácter persoal a que, no seu caso, teñan acceso ou sexan obxecto de cesión no marco de aplicación do presente convenio, de conformidade co que dispón o Regulamento (UE) 2016/679 do Parlamento Europeo e do Consello do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos (Regulamento xeral de protección de datos), a Lei Orgánica 3/2018, do 5 de decembro, de protección de datos persoais e garantía dos dereitos dixitais, e demais normativa aplicable en materia de protección de datos.

E, en proba de conformidade, as partes subscriben o presente convenio, constando como data do mesmo a correspondente á última sinatura realizada.

Pola Consellería do Mar

Alfonso Villares Bermúdez

Conselleiro do Mar

Pola Universidade da Coruña

Ricardo José Cao Abad

Reitor da Universidade da Coruña